

Date – 16/05/2025

Time - 18:30 Hrs

HEADLINES (EVENING)

1. Nizanah sorkar website pahnih Pakistan in an hack tih Chief Minister Pu Lalduhoma'n a sawi.
2. LADC Floor test neih tura Chairman Pu T. Zakunga'n vawiina Session a koh chu High Court thu angin thulh a ni.
3. International Monetary Fund-in Pakistan puihna sum pek a tum chu ngaihtuah tha leh turin India-in a ngen.
4. Vawiin khan ramchhung hmun hrang rhangah Operation Sindoor neih zawh taka sipaite huaisenna leh inpekna zahna lantirna kawngzawh Tiranga Yatra neih a ni.

<><><>

CM

Nizanah sorkar website pahnih Pakistan in an hack tih Chief Minister Pu Lalduhoma'n a sawi. Vawiina Dawrpui Multipurpose Centre, Digital Transformation Conclave vawi 17-na a hmanpuinaah Chief Minister chuan a sawi a. Nizana sorkar website hack te hi reiloteah lak let leh a nih thu sawiin he thil thleng hi fimkhur nana hman a pawimawh thu leh cyber security chak leh rintlak zawk nei zel tura fuihtu ni se a duh thu a sawi a ni.

Chief Minister chuan a kaihhruai ZPM sorkar tirh kum 2023 December thla atangin digital lamah nasa takin hma an lak thu sawiin Mipui Aw, Kai App, internet kaltlanga damdawiin OPD card lakna leh a dang te bakah sorkar hmasawnna hnathawh vil hna chu tunlai thiamna hmanga an kalpui thu leh paper hmang loa sorkar office hna thawk zel turin hma lak a nih thu a sawi a ni.

Digital Transformation Conclave hi ICT dept, Govconnect, Google Cloud leh Ilouge Media te tangkawpin an buatsaih niin sorkar hruaitu, mithiam hrang hrang leh company hrang hrang te tunlai thiamna ti hmasawnna tur ngaihtuah tura an fuankhawmna hun a ni a, India ram hmun hrang hrangah hman thin a ni.

Nizana Mizoram sorkar website Pakistan mi nia insawiin tihchingpen an tum chuan sorkar thil khawih pawl a neih loh thu leh siamthat a nih tawh thu Information & Communication Technology (ICT) department hotute chuan an sawi.

Akashvani in a kawmnaah ICT hotute chuan tunhnaiah Mizoram sorkar website pahnih chu beih tum an awm anga an hriat thu leh heta langchiang tak chu nizana MPSC website beih tumna a nih thu an sawi a. A website luh chiaha screen lo langah thu thenkhat an rawn zia mai tih loh chu thildang khawih an neih loh thu leh data hloh engmah a awm loh thu an sawi a ni.

Tunhnaiah India ram chhunga website.gov.in tia awm ho chuan beih a tawh fo thu leh an beih tumna anga lang hi Mizoram tum rana thil tih bik lam ni loin a nawlpuia sorkar website a .gov.in tiha tawp hoah a lanchhuah theih thu an sawi a. MPSC pawh chutah chuan a lo tel ve palh mai nia an hriat thu leh hei hi siamthat har a nih loh thu leh Mizoram sorkar website beih tum nia hriat te hi siamthat nghal vek a nih thu an sawi a ni.

ICT hotute chuan tunah hian Mizoram sorkar website chu server thara tihsan mek a nih thu leh sorkar website pawh a chawp te tea an khawih that mek thu an sawi bawh a ni.

Nizana khan MPSC website chu beih tum awmin an website luhchiahin Pakistan mi anga insawiin thuziak an hnutchhiah a. Hetah hian saptawngin tawngkam uluk lo leh saptawng bel lo tih hriat taka zia kin, Pakistan fakna leh India mite vauna thu a inziak a ni.

<><><>

VC ASSN

All Mizoram Village Council Association hruaituten VC te lawmman tihpun a nih theih nan Chief Minister hnenah an thlen.

Nimina Chief Minister Pu Lalduhoma a pisaa an kawmnaah he thu hi All Mizoram Village Council Association hruaitute chuan an sawi a, Chief Minister chuan tun dinhmunah tih nghal rum rum theih nilo mahse VC te lawmman chungchang chu a hriatthiampui thu a sawi a, a theih ang anga hmalakpui zel an nih tur thu a sawi a ni. AMVCA hruaitute chuan ZPM sawrkar in VC Dan thar an pawm ta chu lawmawm an tih thu an sawi a, chutihrual in Village Council Dan thar hi a taka hman vat a nih theih nana hmalakpui turin Chief Minister an ngen nghal a, CM chuan a changtu Minister be nghal in chak taka lo bawhzui turin a ti a ni.

AMVCA hruaitute chuan Mizoram house a VC membrete thlen man concession siam sak an nih theih nana hmalakpui tur in an ngen bawk a ni. Hei bakah hian Aizawlah VC te Khualbuk siam a nih theih nan hmalakpui turin an ngen bawk a Chief Minister chuan a pawimawh a tih thu lo sawi in a hmun hma ngaihtuah vat nise hmalak zel a nih tur thu a sawi a bawk a ni.

Pu Lalduhoma chuan All Mizoram Village Council Association hruitute chu ram hmasawn nan thawhhona tha an mamawh thu a sawi bakah Mizorama an member zawng zawngte hi mahni veng leh khua theuh a hnathawh uluk taka vil turin a chah a, hna chu tu pawh in thawk mahse ZPM sawrkar hnuaiah chuan a tha tur a nih avangin hna tha lo chu a hnenah sawi zel turin leh action lak zel a nih tur thu a sawi bawk a ni.

All Mizoram Village Council Association hruaitute chuan Finance Commission atanga VC te hnathawh tur chung chang leh Mizoram kawngpui hrang hrangte chu Furpuiah mipuiten harsatna an tawh lutuk loh nana hmalak vat a nih theih nan an thlen bawk a, CM chuan chak taka a lo bawhzui tur thu leh an thu thlente chu a pawimawh a tih thu a sawi a ni. All Mizoram Village Council Association hruaitute hi Pu FT Laikhama'n a ho a ni.

<><><>

CYMA

Central YMA President Pu Lalhmachhuana chuan Mizo thalai te zingah entawn tlak tak tak, taima leh thawkrim an awm a ni a ti. Vawiina Central YMA buatsaiha kumin 2025-a HSLC leh HSSLC mizo zirlai top ten-a tling mi 59 chawimawina hun Central YMA Hall, Aizawla hmanah he thu hi a sawi a. Ram leh hnam tana hmabak nei tha tak takte chu YMA chuan beiseina sang takin an thlir tih a sawi a ni.

Chawimawina hunah hian Planning & Programme Implementation department Secretary Pu Lalmalsawma Pachuau pawhin thu sawiin zirlai tha bikten ram leh hnam hmangaihna rilru nen lehkha zir a tul thu a sawi a. A thiam bik ni ve pha lote tan mawhpurhna an nei tih sawiin an tan kawng kawhhmuhtu an ni tur a ni a ti a. Rilru put hmang dik nena an hmasawn thei tura lehkha zir turin a fuih a ni. He hunah hian zirlai 59 hnenah chawimawina thuziak leh lawmpuina tangka fai pek an ni a. HSLC ah mi 22, HSSLC (Arts)- 16, Science -11 leh Commerce ah mi 10 hnenah pek an ni.

Vawiin vek khan Central YMA chuan kumin February ni 24-a Bangladesh a Sajek tlangdunga awm, Mahmuam khuaa kangmei chhuak a Mizo chenna In 18 kang tuarte tanpuina Sajek Branch YMA hruaitute hnenah Rs. 5,11,800.00 an hlan. Tanpuina hi President Pu Lalhmachhuana’n Sajek Branch hruaitute hnenah a hlan a ni.

<><><>

LADC

Lai Autonomous District Council vawiina Floor test neih tura Chairman Pu T. Zakunga’n Session a koh chu High Court thu angin thulh a ni. Lai Autonomous District Council Sorkar buai chho mek ah hian Pu V.Zirsanga Court lama a zualkona chu nimin khan Gauhati High Court Aizawl bench chuan a ngaihtuah a, Pu N.Zangura CEM atan ruat a nih danah LADC dan dinglai palzutna a awm thu te court ah hian sawilan niin, United Democratic Alliance Sorkar din nana hmalakna felhlel lai ni a ngaih te sawi lan niin, Sokar ukil lam pawn thil nih dan tlangpui a sawifiah a ni.

LADC Session neih tur chungchang ah Court chuan LADC Chairman Pu T. Zakunga’n May 16 a LADC Session a koh tawh chu kaltlangpuilo turin a ti a, LADC a UDA Sorkar din dan chungchang hi thla thar June 10 ah ngaihtuah leh atan a dah a ni.

Hetianga High Court in thu a dah tak vang hian LADC Chairman chuan May 16 a session neih tur chu kaltlangpui a nih loh tur thu hriattirna a chhuah nghal a ni.

LADC Floor test nei tur hian Larsap Gen (Rtd) Vijay Kumar Singh thupek angin LADC Chairman chuan May ni 16-a Session nei turin alo ko tawh a, Session ah CEM Pu N.Zangura'n thlawptu a neihdan fiahtura ruahman a ni a, High Court thu angin heihi kaltlangpui theih a ni ta lo a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Naktuk zing dar 7 leh a chanve-ah Chanchinthar puan leh a ni ang.

<><><>

DEFENCE MINISTER

International Monetary Fund-in Pakistan puihna sum pek a tum chu ngaihtuah tha leh turin India-in a ngen. Vawiina Bhuj Air Force Station a tlawhnaah Defence Minister Rajnath Singh-a chuan he thu hi sawiin Pakistan hnena tanpuina sum pekte chu a tam zawk firfiakte puih nan hman a ni a ti a. Tun dinhmunah chuan Pakistan tanpui chu firfiakte tanpui ang tluk a nih thu a sawi a ni.

Pu Singha chaun Operation Sindoor-a Indian Air Force te chetdan chu fakawm atih thu a sawi a. India mipuiten an chhuang hle tih a sawi a. Minute 23 chhung lekin Pakistan-a firfiakte in kulhna hmun tam tak an kapchhe vek hman a ni a ti a. Kha operation khan firfiakte laka India dinna chiang taka a tarlan thu sawiin a sipai chakzia leh inbuatsaihna that zia lanna a ni a ti.

<><><>

TIRANGA YATRA

Vawiin khan ramchhung hmun hrang rhangah Operation Sindoor neih zawh taka sipaite huaisenna leh inpekna zahna lantirna kawngzawh Tiranga Yatra neih a ni a. Tripura-ah chuan Union Minister of State for Information and Broadcasting Dr.L.Murugan hoin Tiranga Yatra hi South Tripura district headquarters Belonia ah heihi a ni a. Pu Murugan-a chuan firfiakte chetna lakah zahngiahna an lantir dawn lo tih sawiin rampumah nuai chimih vek an ni ang tih a sawi. Kerala-ah pawh tukin khan Tiranga Yatra hi neih a ni a. Zirlai leh sipai bang te bakah pawl hrang hrang hruaitute an tel a. Madhya Pradesh-ah pawh nimin khan Tiranga Yatra hi Bhopal khawpuiah neih a ni.

<><><>